

Sisimiut Kangerlussuullu akornanni qallersugaanngitsumik aqqusinermik sanaartornermi Namminersornerullutik Oqartussanit inatsisitigut aningaasartuutissat pisariallit tamaasa ingerlatsinermi aningaasartuutit kommuunip nammineq isumagissappagit qulakkeerneqarnissaannut Naalackersuisut peqquneqarnissaannik Inatsisartut aalajangiiffissaattut siunnersuut.

(Inatsisartuni ilaasortaq Anders Olsen, Siumut)

Akissuteqaat

(Ineqarnermut Attaveqaasersuutinullu Naalackersuisoq)

Siullermeerneqarnera

Naalackersuisut aallarniutigalugu siunnersuuteqartoq Anders Olsen, Siumut siunnersuummut matumunnga qutsavigaat. Siunnersuuteqartup qulequtsiussaani suliassat marloqiusaasut Naalackersuisut nalilerpaat. Tassa pisariaqartumik inatsimmi tunngavissaqarnissamik qulakkeerinissaq -, kiisalu aappaattut Namminersorlutik Oqartussat Sisimiut aamma Kangerlussuup akornanni ujaraaqqanik aqqusinniornermi sanaartornermut aningaasartuutit tamaasa akilersinnaanissaanut qulakkeerrinninnissaq. Tamatumalu saniatigut aamma maluginiarneqassalluni kommunip ingerlatsineq nammineq akilissagaa qulequtsiunneqarluni.

Pingaarnertigut isigalugu suliassap suliarinissaanut, peqatigisaanillu suliassap aningaasalersorneqarsinnaanissaanut aningaasaliissuteqarnissamut tunngavissamik qulakkeerisoqassappat naapertuutissaaq. Taamaalilluni aamma ukiunut aggersunut aningaasanut inatsit pillugu isumaqatiginninniarnernut atatillugu immikkoortup salliutinneqarnissaa kissaatigineqarnersoq Inatsisartuni partiit aalajangertussaavaat.

Inatsisitigut tunngavissaqarnissamut tunngatillugu unammilligassat arlallit, aqqusinernut inatsimmi nutaami ataatsimoortinneqartariaqaraluartut siunnersuuteqartup tikkuarpai. Qeqqata Kommunianunaannakkut aqqusinniornissamut soqutigisaqartuni kommunini kisiartaanngilaq. Inoqarfiit akornanni piffinni allani aamma assingusumik kissaateqartoqartarnera siunissami tikiqqartassasoq naatsorsuutigineqassaaq. Taamaattumik tunngaviusumik kommunit aamma Namminersorlutik Oqartussat akornanni inissisimaffiit agguarneqarnerisa paasinarsisinneqarnissaa pisariaqartinneqarpoq. Tassunga tunngatillugu ataatsimoortumik tapiissutit isumaqatiginninniutigineqarnerannut atatillugu illoqarfiit akornanni aqqusinernut nammatassaq suliassallu agguarsimanerannut tunngatillugu Naalackersuisut Kommunillu akornanni oqaloqatigiinneq ingerlavoq. Isumaqatiginninniarneq taanna, taassumalu inernissaa aqqusinernut inatsisissami nutaami ilaatinneqassasut Naalackersuisunit pingaartinneqarpoq, tassani suliassat nammatassallu agguagaanerat nassuiarneqarsinnaallunilu paasinarsisinneqarsinnaammat.

Aqqusinernut inatsimmik nutaamik suliaqarnissaq suliaassaavoq, isumalluutunik annertunerusunik pisariaqartitsiviusussaq. Taamaattumik inatsimmi tunngavissamik pisariaqartumik qulakkeerinnissamik peqqusinermut atatillugu tamanna eqqarsaatigineqartariaqarpoq aammalu suliaassap suliarinissaanut aningaasaliissutissanik pisariaqartunik immikkoortitsisoqartariaqarluni. Naalakkersuisut missingersuipput inatsimmi nutaamik suliaqarnissamut aningaasartuutissat 0,5 mio. koruunit missaannik annertussuseqassasut.

Qeqqata Kommuniata aqqusinermut pissusiviusuni aningaasartuutissanut missingersuinermik, ujaraaqqanik aqqusinniornissamut b-overslagitut ittumik suliaqarneq aallartissimmamagu Naalakkersuisut nuannaarutigaat. Siunnersortit suliaasaat neqeroortitsivigineqareerpoq, aammalu 2023-p naanerani missingersukkat naammassissasut naatsorsuutigineqarpoq. Naalakkersuisullu aamma innersuusutigerusuppaat Oxford Global Projekt nalunaarusiaa malillugu inassuteqaatit 13-iusut oqariartuutaat, taannami suliniummi pitsaaqutunik aammalu mianerisassaasinnaasunik imaqarmat.

Tamatuma saniatigut Kangerlussuup siunissaanut suleqatigiissitaliap nalunaarusiaa Naalakkersuisut saqqummerseqqammerpaat. Tassani aamma inassuteqaatit arlaqarput, aalajangiinnissamut tunngavissanut kiisalu ingerlatsinermut aningaasartuutit akilerneqarnissaannut tunngatillugu nammatassat agguagaanerannut tunngassuteqartut. Inassuteqaatit taakkua pissusissamisorluinnartumik aamma aqqusinernut inatsisissap suliarineqarnerani ilaatinneqassapput.

Taasissutissap kalaallisut allassimanerani paasiuminaassinnaanera eqqarsaatigalugu Naalakkersuisut imaattumik allannguutissatut siunnersuummik saqqummiussaqarput:

“Nunatsinni ujaraaqqanik qallersukkamik aqqusinermik sanaartortoqarsinnaanissaa Naalakkersuisut inatsisitigut qulakkeerinnittumik suliaqassasut, taamaasiornikkullu Sisimiut Kangerlussuullu akornanni ujaraaqqanik qallersukkamik aqqusinniorneq Namminersorlutik Oqartussanit tamakkiisumik aningaasartuuteqarnissaanik Naalakkersuisut qulakkeerinnissasut, kiisalu kommuunip nammineq ingerlatsinermi aningaasartuutunik qulakkeerinnissasoq, Naalakkersuisut peqquneqarnissaannik Inatsisartut aalajangiiffigisassaattut siunnersuut.”

Taamatut oqaaseqarlunga Naalakkersuisut sinnerlugit siunnersuut Inatsisartunut suliaassanngorparput.